



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 7

Manchester City defender
John Stones yiruogo

Trump-i Panama Canal meyipa
agitsü amokmeren



VOL. XXII ISSUE NO. 75 (ADOK 75) DIMAPUR TENTONÜ (MONDAY) LUCHII (DECEMBER) 23, 2024 ₹ 5.00

Dimapur Police-i Thahekhu ken o nung tai tongokja alir ajak puogo

Dimapur, December 22, 2024

(TYO): December 16 aser 17 aonung NSCN (R) Akato züngsem kar den civilian temi nisung asem pur züka merenshiba ken o nung tai tongokja alir nisung ajak puogo.

Dimapur Police-i nisung tenet den AK-47 Rifle aser pistol kaka puogo. Iba sendakba nung December 17, 2024 nü Sub-Urban Police station, Dimapur nung ken o ka benoka liasü aser bushisüngdanga arudar.

Police-i apurtem ya Khevito Yeptho (28), Itovi Yeptho (39), Atoka Sumi (37), Kakuho Achumi (26), Jonathan Ngade (45), Lumtsaba Sangtam (30), aser Holuvi Yeptho (34) nunger lir. Parnok rongnung nisung pezü Akato-i aniba NSCN züngsemtem lir.

December 16 aser 17 atongtepba aonung Church Road, Dimapur nung gari ka aser scooter tsüktep ta Commissioner of Police Dimapur, Kevithuto Sophie-i ashi.

Scooter nung mena aliba nisung ana jagi yanglushitsü atema sen meshi aser iba sülen tena medemer kar aja. Tena medemertemji NSCN züngsemtem liasü aser parnoki gari nung mena alir nisung ana Thahekhu yimtsüng nung ki kati anir ao ta Sophie-i ashi.

Thahekhu yimtsüng nungi gari nung mena alir nisung ana jagi tena medemertem aja aser parnok aruba sülen par asem pur züka merenshi ta paisa shisem.

AK-47 aser pistol ka bener nisung asem dangji police dangi maotsü aser parnok tejak aser

maitsü jangjarji mapang aser tesem mashii ka nung mapa inyaksü ta amokmerena liasü.

"Iba tatalokba atema police-i mezüngbo ken o benoktsü nungnanga liasü ta ashibaji tiyazü lir. Police-i ken o mebenokdang tamasa tatalokba jungjunga jangjatsü meranger aser iba sülen ang koba section kübok nenoktsü lemteter. Ken o mebenokdang tamasa takoksa ajururtem dang nungi kuli bendener aser iba sülen ang ozüng tapet kübok FIR benoker" ta Commissioner of Police-i jangjashitsü.

December 17 anogo nungsa police-i tai tongokja alir nisung asem apu, iba sülen December 18 nü nisung ka aser tanüngba nisungtem December 21 nü apu, ta paisa ashi.

Telok balala aser talisa Thahekhu Village Council teyaritap ajanga police-i nisung ajak pua arutetba atema pelaba metetdaksür ta Kevithuto Sophie-isa metetdaksü.

Naga yimten teloktemi ozüng alema inyaksangshirtem manioktsüla mesüra kümzüka mayutsü mepishir. Parnok civilians mesüra telok kar nung züngsema liang, ozüng alema inyaktertem telok shingai kümzüka mayutsüla ta paisa ashi.

Teloktemi sorkar mesüra sorkar agency balala nem mapang züngzüksüba ya yimya ka kümogo. Police-i akokba tashi ozüng alema inyaksangshiba azüoktsü aser aibelenertem aputsü atema meranga inyakdang teloktemi mebilemdangi mapang züngzüksür ta Commissioner of Police-isa metetdaksüogo.

CALT-i NSCN K (Khango) aitsür

Dimapur, December 22, 2024

(TYO): NSCN K (Khango) teloki tashiyim agi December 16, 2024 nü Aolemba Lkr dang Rs 50 lakh meshiba khukhua aitsür ta Chumoukedima Ao Lanur Telongjem (CALT)-i metetdaksüogo.

Iba dak sendakba nung CALT-i Decem,ber 17, 2024 nü Chumoukedima PS nung FIR ka benoka liasü aser ozüng amertem tapet mapa inyaksü aremzüka ata. Ajisüaka tang tashi nung iba tashiyim agi sen meshirtemm apuba osang kecha mali anungji

bangdakpurtemi tekaratiba nung aibelenertem aputsü aser ozü züngsemtem kümzüka ayutsü mepishir, ta parnoki ashi.

"Aolemba Lkr ya 7th Mile Chumoukedima nung senso tajung ka aser CALT nung züngsem ka lir. Pa ya Country Craft Development Society nung Chairman lir aser Nagaland nungi President aser Governor ajanga sempet angur ka lir anungji pa nem timtem masü saka akhümtsübu agütsütsü langa lir" ta Media Cell, CALT-i sangdong ka nung ashi.

CM Rio-i DoNER/NEC dang senotsü teimba lemkütsütsü ajungshi

Dimapur, December 22, 2024

(TYO): Chief Minister Neiphiu Rio-i December 21, 2024 nü Agartala nung NEC Governing Council nung o jembidang NEC ajanga terenlok bener aruba lemsatop.

NEC ya 1971 nungi Regional Planning body ka ama inyaka arur ta 72nd Plenary session nung CM Rio-i ashi.

"North Eastern Council (NEC) tenteter küm 50 jungnüa arur saka tanga state tem den medemdanga terenlok tsütsü memenep lir. NEC ya nungdak balaka atema nukjidong balaka yur tentetba lir anunji senotsü peria lemkütsütsü nungdaker" ta pai ashi.

Kümtem süia arudang Parliament ajanga tentetba NEC inyakyim nung kongshio go aser tanübo NEC ya tongtipang masü ama kümdaksüogo, ta pai ashi.

"Tesüiba Plenaries nung ni NEC inyaksangshi mali akümba aser NEC asoshi senotsü teimba lemkütsütsü indang shiogo.

Anungji NEC Chairman-i maneni senotsü teimba lemkütsütsü aser mapatong lemkütsüba nung tashi talila agütsütsü mepishir. Yamaji asü nung dang NEC-i state tem nungdakra peritsütsü" ta CM Rio-i ashi.

India sorkari PM DevINE

as er NESIDS (ROADS) kübok North Eastern State tem nung scheme balala inyakba atema pelar, ta paisa ashi.

"Centre-i item mapa inyakba atema tenüngsang agütsü saka reprangdangra PM DeVINE kübok Nagaland atema 2022-23 nungi 2025-26 tashi Rs. 561 crore aser NESIDS ROADS kübok kasa mapang atema Rs 276.69 crore dang lemkütsüba lir. Senotsü lemkütsüba ajanga teyari angur saka mapatong tulutem inyaksü meperir" ta pai metetdaksü.

Anungji PM DevINE aser NESIDS (ROADS) kübok senotsü teimba lemkütsütsü ayongzüker kechiyong iba ajanga dang Nagaland nung nübortemi agiüba ama terenlok bener arutettsü, ta CM Rio-i ashi.

Paisa NITI Aayog aser Line Ministries ajanga mapang shitak nung mapatongtem atema temelaba magütsüba indang ashi.

Iba ajanga mapang shitak nung schemes aser projects meinyakteter aser sendaktepa alirtem mepelaba den terenlok mapa menua inyaksüsa akümer ta Rio-i ashi.

"December/January tashi nung state tem dang priority list meshitsü aser April/May tashi nungbo DoNER/NEC ket nung

State Priority List agütsütsü atema mapang lateta ayutsüla. Kodang yamaji inyakdir June/ July tashi nung Ministry-i temelaba agütsütsü aser August/ September nungi tendering process inyakba sülen October nung work order agüja November ita nungibo mapa tenzüka inyaktettsü" ta pai Minister dang ashi.

Senotsü peria maliba ajanga state sorkari mapatong tulutem meinyakteter. State sorkari Ciethu, Kohima nung Airport ka yanglutsü, urbanization & industrialization ajungkettsü atema Foot Hill Road yanglutsü, saisapongbaren ajungkettsü atema Dimapur nung Multi-Disciplinary Sports Complex Sports renemtsü aser National institute ama Indian Institute of Science Education and Research (IISER) lapoktsü mapatongtem agüja lir, ta CM Rio-i ashi.

DoNER Ministry/NEC ajanga maneni item mapatongtem pusema nungitsü aser bangdak agency tem den amalitepa mapatongtem agizüktsü mepishir ta pai ashi.

Nagaland state nung tensa kanga süngjema kümogo aser 25 buba Hornbill Festival 2024 takok ngua mongogo ta CM Rio-isa lemsatop.

Kiralongrartemi Siliguri corridor amaktsü tasa aliasü

Kolkata, December 22, 2024

(Agencies): Ansarullah Bangla Team (ABT) indang sleeper cell kati Siliguri corridor nung ozüng alema mapa inyaksü tasa atonga liasü ta West Bengal police-i ashi.

Siliguri corridor ajanga Northeast state temi linük den sendakteper.

Assam, Meghalaya, aser Tripura dena northeast state tem nung ketdangsürtemi

Kerala, Assam, aser West Bengal nungi züngsem 8 agi akümba sleeper cell ya Assam Police Special Task Force (STF) ajanga puogo aser parnoki Ansarullah Bangla Team (ABT) indang transnational network kuli agütsüogo.

ABT ya Jamaat-ul-Mujahideen nungi razüka aoba telok ka lir aser India, Bangladesh, UK, aser US nung ozüngi noktanga lir.

Assam police-i apurtem rongnung ana West Bengal kübok Murshidabad nung apu. December 18 nü Special Task Forces (STF) Assam aser West Bengal Police yaritepa tena apu.

"Iba sleeper cell yagi kin o kin telemsa aser rongsenketzüng jenjang majungba nung ajemdaker lanurtem anioktsü merang" ta West Bengal STF Inspector General (IG), Gaurav Sharma-i ashi.

Iba tasa atongsang Farhan Ishrat-i Bangladesh nungi Saad

Radi ta ser züngsem ka India-i yok. Radi-i Kerala, Assam, aser West Bengal state tem semdangogo.

"Parnoki Siliguri corridor nung kiralongraba mapa inyaksü tesep amenoktsü nukjidong liasü" ta Additional Director General of Police (ADG), South Bengal Supratim Sarkar-ia ashi.

Murshidabad kübok Hariharpara nung Minarul Sheikh (48) aser Md Abbas Ali (29) na apu. Sheikh ya pump mechanic ka lir aser Ali anema ken o aika benoka lir.

Parnok ket nungi mobile phones, documents, aser 16GB pen drive pua lir aser Assam STF-i temji reprangdar.

Nagaland Pradesh Congress Committee-i Khristmas salem abener

Dimapur, December 22, 2024

(TYO): Nagaland Pradesh Congress Committee (NPCC)-i nisung ajak dangi Christmas salem abenba metetdaksüogo.

Khrista asoba ajanga alima dangi temeim, teimla aser yimjung bener arutsüba sayuba mapangji Christmas lir. Iba

Christmas ajanga asenoki taochi, aria bilemba aser longjema alitsü tangatetba agütsüba mapang ka sudakjangma, ta Communications Department, NPCC-i sangdong ka nung ashi.

Asenoki agütsüba aser lemsatepba ajanga tarutsü tajung ka yangertü merangdi ta

parnokisa ashi.

Iba Christmas ajanga nenok kibongtem nung tepela aser temoatsü ngudakjang ta sarasademtsür. Maneni taruba küm ajanga azükaru, anema aliba aser maongka tasen ajak nem bentsür arungma ta moatsür, ta NPCC-isa metetdaksü.

METETDAKTSÜR:

December 23, 2024 anogo nungi December 26, 2024 tashi Tir Yimyim nung inyaktertem Christmas sodi agir, anungji December 28, 2024 adok nungi dang Tir Yimyim angutsü.

Tir Yimyim azüngertem ajak nem Tsüngrem temeim Christmas salem agütsür. Tsüngremi Christmas mapang aser teti nenok taküm aser kibong nung tesünep aser tepela lidakjangma !

- Yimozülur.

Kiphire nung Good Governance Week workshop agi



Deputy Commissioner, Kiphire indang Conference Hall nung December 21, 2024 nü Good Governance Day indang workshop agidang tangokba noksa ka nung Deputy Commissioner, Kiphire, Tamsuwati Longkumer den district ketdangsürtem angur.

Dimapur, Luchii/December 22 (TYO): Good Governance Week dak sendakba nung Good Governance Day indang workshop ka Deputy Commissioner, Kiphire indang Conference Hall nung December 21, 2024 nü agia liasü. Good Governance Week ya December 19-24, 2024 anogotem lir.

Iba sentong nung Deputy Commissioner, Kiphire, Tamsuwati Longkumer, NCS ajanga ketdangsürtem pela

agizükba o jembi aser DHEW Coordinator, Villiho Awomi-i tetsürtem dak sendakba scheme balala indang jembi aser Nodal Officer, CMHIS-PMJAY, Yangtsapila-i insurance scheme indang jembia liasü.

Assistant Supply Officer, Food & Civil Supplies Department, Renthungo-i ration indang onük nung jembi aser EAC (Dev) Takatemjen Pongnen-i PowerPoint presentation amshia state aser central sorkar indang scheme

aser sentong balala indang jembia liasü.

Kasa sentong nung DPA (Education) Kiphire, Alumse-i NECTAR projects ajanga district nung terenlok maparen balala inyakba indang PowerPoint presentation agütsü aser EAC, Nitile Tep, shiba APIO lir, pai grievances redressal aser RTI inyakyim indang jembia liasü.

Maneni district administration, Rural Development Department, Education aser Medical department temi parnok ajanga inyakba maparen balala indang lemsatop aser iba sülen question-and-answer session ka liasü.

Iba sentong nung EAC Kiphire, Zavito Ltu menden liasü aser ADC Kiphire, Longtiba L Sangtam-i melepzüng o jembi.

Iba sentong ya Department of Administrative Reforms & Public Grievances, Ministry of Personnel, Public Grievances and Pension, Government of India totuyuba nung agia liasü.

Asür Rev. Kijung takum otsü kaket "ODANGJONG" saya



Dimapur, Luchii/December 22 (TYO): American Baptist Foreign Mission Society Missionary ket nungi Ao Naga Baptist Arogo Mungdang nung mezüng khu benzüka Executive Secretary inyaksang Rev. Kijung takum otsü kaket "ODANGJONG" saya sentong Kids Worship Centre Khermahal, Dimapur nung December 16, 2024 anogo agia liasü.

Sentong lenir Robert Longkümer, Director & Founder, Kids Worship Centre, Dimapur liasü aser sentong tenzüka Lirmen Baptist Arogo Senso Missionary, I. Ben Jamir-i sarasadem. Kijungba'er jala Merangkala-i tarur ajak pelaa agizük aser Former General Secretary CBCNEI Rev. Dr. K.I. Aier-i tena külemi inyaka aruba taküm nung tongtibang tatalokba otsü aika lemsatop.

Rev. N. Shaipa Konyak, Missionary at large, shiba Rev. Kijung den Konyak Mungdang nung külemi inyak, pai Konyak Mungdang asoshi Pay Scale (ROP) yanglutsüba, Pastor License makartemi temeshi satikoli agütsüba aser kibong akumtsupurtem aritepa alu nungi adoker teka mamtepi satikoli agiba item ajakji Rev-ba arur melenshitsu aser Konyak Mission Centre ali tasazük affidavit aser Map nung jungjunga renema yutsüba indang aika lemsatop.

Bendangla Jamir, former Women Secretary ABTM ajanga iba sentong nung jembidang Rev. Kijung-ji kanga taremzüik den ajak den kasa litetba lenir ka; NBCC aser CBCNEI mensem ajak nung nisungtemi Rev. Kijung-i kechi ashir ta pa dak imlaa liasü, ta tatalokba aser ngua arubatem lemsatop.

Rev.I. Toshi Jamir, former Church & Mission Secretary, paia Rev. Kijung-ji taremzüik, ajemalu, ajak den sakusa litetba aser mapa nendaka meranga inyakba tenzüker ka ta kuli agütsü.

Kaket zülur Mar Longkümer-i kaket züludang temoatsü anguba yamai ashi, asen tsüraburji temulung tulu, tasü tait, tatinemti shisatsü aketba lenir aser tanela agi sünga aliba Tsüngrem tenzüker; pa taküm otsü kaket ya zünger Tsüngrem tenzükerkem ajaki pa ama inyaksüla. Kaket zülur Rev. C. Walu Walling-i iba kaket koda zülua aru itemji rasaa ashi aser iba den kaket tenüng "Odangjong" rateta ashi. Iba "ODANGJONG" kaket Former Executive Secretary Rev. Dr. L.Kari Longchari saya aser pa indang kuli aika ashi.

Tatem nung tarur ajak dang pelaba O, Rev. Kijung'er chir K.Moa Longkümeri jembi aser sentong tatem küma loktii indang aika lemsatop.

Manipur: Kuki tetsür teloki NCW aitsür

Imphal, Luchii/December 22 (Agencies): Manipur nung mapang talangka kin o kin tsüngta azüdokshia arudang National Commission for Women (NCW) ajanga mapa shidak meinyak ta Kuki Women Union (KWU) aser Kuki Women Organisation for Human Rights (KWOHR) ajanga aitsü.

May 3, 2023 nü mepetmesü tenzükerba sülen Kuki tsür temi timtem balala ajuruba aser bendanga amshiba Commission-i senzüka yutsü ta telok ana yagi aitsü.

NCW Joint Secretary A. Asholi Chalai ajanga Manipur DGP dang Republican Party of India (Athawale) ajanga tezüluba nung takhangba

agütsüba mezüng inyaksü totuyuba agütsüba KWU yagi tuteta ashi.

"Commission yagi metokmeperi ajak sako reprangtsüla, aser yimtenren tejangraba nem ajungmesoa ken o meshimdangtsüla," ta KWU Vice President Neneu Kipgen-i ashi.

Tekeraba nung tebensa makai mapa inyaksüla aser maneni yamai senzüka yutsüra onoki international jenjang nungi teyari bushitsü, ta KWU ajanga ashi.

"Obendangba ya kin mesüra tamangba yimsü nung ajemdaker masütsüla," ta parnok i ashi.

Kasa mapang KWOHR-ia sangdong balaka nung NCW ya

anemsü lir ta aitsü aser Kuki tsür anema tashiyim mapa amshiba atema asaa ola madoker, ta ashi.

Ochi obendang asoshi aiben mepishiaka NCW ajanga telangzüba magütsüba aitsür, ta KWOHR indang general secretary Kimneihoi Lhungdim-i ashi.

NCW yagi tatalokba kar, tatishitsü agi Jiribam nung azüdokshiba ama, bushisingdanger, saka Kuki tsür anema mapa tamajung inyakbabo senzüka yutsür ta ashir.

Manipur Chief Minister N. Biren Singh'er sorkari telungpur yarir aser parnok i Kuki Christian tribals dak tenük yoker kin mürektettsü nükjidong yur inyaker, ta KWOHR-i aitsü.

Yachem Baptist Church küm 75 jubilee mungogo



Dimapur, Luchii/December 22 (TYO): Khristan yimsü agizüker Yachem Baptist Church küm 75 ajungba Platinum Jubilee sentong December 17-19, 2024 anogotem Yachem Village, Longleng nung 'Glory to God Alone' omen nung ajemdaker munga liasü.

Iba benjongmung sentong

nung o jembirtem ya Executive Secretary, PBCA, N. Tialemba Phom; Senior Pastor, PBAD, C. Hamba Nemdakly; Pastor KPBC, Rev. Phomlee Van aser Women Secretary PBCA, P. Angbhenla Phom nungertem liasü.

Sentong nung Executive Secretary, PBCA, N. Tialemba Phom ajanga Tsüngrem o

jembidang, tesüiba küm 75 tsüngta Tsüngremi Yachem nübur dang taochi aser temoatsü agütsüba indang rateta ashi aser Tsüngrem atema inyaker ka-ka akumtsü ayongzüka liasü.

Iba sentong nung taoba minister S. Pangnyü Phom, Secetary (Retd.) Y. Denngan Avennoho aser dangar temia lokti den tajungshi aser tayongzükerba o jembia liasü aser lanurtem asoshia shisa tajung lemsatop.

Iba sentong nung Yachem nübur ajunga, Phom Churches, danga kin nungi jaokertem aser anükabangtem dena liasü.

Asemnü Yachem Baptist Church Platinum Jubilee ya chairman, Jubilee Planning Committee, M. Takochungba aser Pastor Yachem Baptist Church, Rev. M. Adao na lenisüba nung takok ngua agir tembanga liasü.

Niuland nung Good Governance workshop agi



December 21 nü DC Conference Hall, Niuland nung Good Governance & practices dak sendakba nung workshop agiba mapang DC Niuland, Sara S. Jamir aser sentong nung shilem agirtem tangokba noksa nung angur.

Dimapur, Luchii/December 22 (Agencies): Good Governance & practices dak sendakba nung workshop ka Niuland District nung December 21 nü DC Conference Hall, Niuland nung agiogo.

December 19 nungi 24 tashi "Prashasan Gaon Ki Aur" omen nung ajemdaker Good Governance Week amungba mapang iba workshop ayongzüka agiogo.

Sentong nung DC Niuland,

Sara S. Jamir-i, Good Governance dak ajemdaker o tatsüka jembi aser iba mapang lai department, officer aser Staff ajak dang nüburtem nem kecha tebandang makai service tajungtiba agütsütsü ajungshia liasü.

SBI Niuland Branch Manager aser SDAO Niuland-i Department inyakyim indang tatsü agi metetdaksü aser EAC Niuland-i tepela anküp o jembiba sülen iba sentong tembanga liasü.

India aser Kuwait nati asalentong tsütsü tesendaktep yangluogo



December 22, 2024 nü Kuwait nung Ato kilonser, Narendra Modi leniba nung ketdangsertemi Kuwait ketdangsertem den senden amendang tangokba noksa nung angur.

Kuwait City, Luchii/ December 22 (Agencies): Amongnü Kuwait nung India Ato kilonser Narendra Modi-i Kuwait Emir, Sheikh Meshal Al-Ahmad Al-Jaber Al-Sabah den senden amenba sülen linük anati asalentong tsütsü tesendaktep yangluogo.

Tena lenisüba nung linük anaprongla nungi ketdangsertem senden amendang linük anati information technology, pharmaceuticals, fintech, infrastructure aser security tsütsü amalitepa inyaktsü atema bangjem.

Senden tembangba sülen Ato kilonser, Modi-i X ajanga, "Kuwait Emir, Sheikh Meshal Al-Ahmad Al-Jaber Al Sabah den senden takok ngua menogo.

Onoki pharmaceuticals, IT, FinTech, Infrastructure aser security sectors nung amalitepa inyaktsü atema telemtetba agiogo," ta metetdaksü.

"Asen linük ana tsüngda tesendaktep junga aliba nung ajemdaker linük anati maneni asalentong tsütsü tesendaktep yangluogo, aser tarutsü nung iba tesendaktep ano tajungba akümtsü ni imlar," ta paisa metetdaksü.

Honibarnü Modi Kuwait tonga oa liasü. Tesüiba küm 43 tsüngda Kuwait mezüng semdangba India nunger Ato kilonserji pa asütsü.

Ato kilonser Modi-isa Crown Prince, Sheikh Sabah Al-Khalid Al-Sabah-a ajuruogo. External Affairs Ministry

(EAM) otongdar, Randhir Jaiswal-i, India aser Kuwait tesendaktep ano temaba jenjangi ajungketsü atema rangloker Ato kilonser Modi aser Emir na tsüngda senden amen, ta metetdaksü.

Ato kilonseri Kuwait nung India nunger taküm jenjang ajungtsü atema Emir-i inyakba atema pa dang pelaba lemsatsep, ta Jaiswal-isa metetdaksü.

Honibarnü Modi-i sentong ka nung yangji aliba India nungertem den jembia liasü, iba sülen Indian labour camp semdang.

India nunger Ato kilonser kati tesüsabuba Kuwait semdangbaji 1981 küm taoba mapang Ato kilonser, Indira Gandhi-i semdangba liasü.

Christmas Market nung yirur 200 rongnung India nunger 7 lir

New Delhi, December 22 (Agencies): December 21, 2024 nü Germany kübok Magdeburg nung kiralongrar kati gari amshia Khristmas market ka amakdang nisung pongu asü aser nisung 200 dak tema yiruja liasü.

Iba lendong nung yirurtem rongnung India nungera nisung tenet densema lir.

Khristmas market nung nisung longsoa alidak Saudi Arabia nunger kati gari anir oa

lokti dak tsükoksüba lendong nung yirur nisung 200 rongnung India nungera nsiung tenet densema lir. India nunger tenet rongnungjagi nisung pezübo tang tashi hospital nung mongdar.

Ministry of External Affairs (MEA)-i, Germany nung Indian mission-i iba lendong nung yirur India nungertem den tongtepratepdar, ta metetdaksü.

Germany yimtiba, Berlin

nung aliba Indian embassy-i X ajanga, Indian mission-i iba lendong nung yirur India nungertem den yaritepdar, ta metetdaksü.

MEA-i sangdong ka ajanga, "Magdeburg, Germany nung Khristmas market amakba tatalokbaji onoki sashia aitsür. Senti taküm aika samaogo aser aika yiruogo. Takoksa angurtem atema onoki sarasademtsür," ta metetdaksü.

Congress-i SC dang Pegasus spyware bushisüngdangtsü mepishir

New Delhi, December 22 (Agencies): Amongnü Congress General Secretary, Randeep Surjewala-i, US nung Pegasus spyware ken o angadanga obendang agütsübaji ajanga India nunger indang WhatsApp number 300 itdangitba kuli jangjar, anungji Supreme Court-i iba ken o ya bushisüngdangtsü asü?, ta asüngdang.

Surjewala-i, tang mezüng US nung court kati Israel nunger NSO Group indang spyware Pegasus ozüng alema amshiba metetdaksü, ta ashi.

"Pegasus spyware ken o nung obendang ya ajanga India nunger indang WhatsApp number 300 itdangitba jangjar," ta Surjewala-i X ajanga metetdaksü.

Paisa, joko Narendra Modi-i aniba sorkari parnoki itdangitba India nunger 300 tenüngji sangdongtsüla, ta metetdaksü.

Congress leniri, "Union minister anaji shiba? Opposition lenir asemji shiba? Constitutional authority ji shiba? Osangbenertemji shirnok?

Business inyaker nisungtemji shirnok? BJP sorkar aser agency temi kechi osangsa itdangit? Ibaji (Pegasus) koma amshi – koma tim mesüi amshi aser ibaji ajanga kechi asü?" ta asüngdang.

"Meta v/s NSO ken o nung US court kati obendang agütsübaji Supreme Court-i reprangshitsü asü? 2021-22 küm Committee of Technical Experts on Pegasus Spyware-i agütsüba report ji Supreme Court-i sangdongtsü asü?" ta Surjewala-i asüngdang.

"Ochi obendang agüja Pegasus ken o tembangtsü atema Supreme Court-i Meta dang tenüng 300 ji agüjang ta ashitsü asü?" Facebook (tangbo Meta)-i Pegasus amshia India nunger anema inyakba tenüng 300 ji sangdongtsü asü, kechiyong WhatsApp aser Facebook amshir teimtibaji India nung lir aser India nung subscribers anepalutsü aser osang shidak ashitsüji parnok teinyaktsü mapa masü no?" ta Congress lenirisa asüngdang.



December 22, 2024 nü Chennai nung Khristantemi Khristmas sentong ka nung shilem agidang tangokba noksa nung angur.

PM Modi-i nisung 71,000 nem mapa nung shimba shidi agütsütsü

New Delhi, December 22 (Agencies): Hombarnü Ato kilonser Narendra Modi-i video conferencing ajanga nisung 71,000 nem central sorkar department balala nung mapa nung shimokba shidi agütsütsü.

Rozgar Mela kübok mapang shia nisung aika nem mapa nung shimokba shidi agütsür; iba ya Ato kilonseri mapa aika adokdaksütsü atema mangdang yur inyakba ataloktsüba lir, ta Prime Minister's Office (PMO) sangdong ajanga metetdaksü.

Hombarnü video conferencing ajanga nisung 71,000 nem appointment letters agütsüba sülen pai lokti den

jembitsü, ta PMO sangdong nung shia lir.

Nisung 71,000 dak tema central sorkar ministries aser department balala nung shimokba Rozgar Mela sentong ya tesem 45 nung agitsü.

Linük tesem balala nung tang mapa nung tasen shimokertemji ministries/departments balala nung inyaktsü; item rongnung Union Ministry of Home Affairs, Department of Posts, Department of Higher Education, Union Ministry of Health & Family Welfare aser Department of Financial Services densema lir, ta PMO sangdong ajangasa metetdaksü.

Mohali nung ki chirepba tesem nungi tasü mang ana agitetogo

New Delhi, December 22 (Agencies): Punjab kübok Mohali nung ki tamentep aika chirepba sülen Amongnüa ki chirepba jana nungi tasü mang ka agitetogo.

Tang tashi nung ki chirepba jana nungi tasü mang ana agitetogo aser maneni nisung pongubosa jana jagi rembanga alitsü südi, ta bilemer.

Honibar nikongdang Mohali district kübok Sohana yimdak aiben amentepa asüba ki ka chirepba mapang nungi tenzüka tang tashi kümzüka maparen inyakdar.

Amongnü anepdanga National Disaster Response Force aser Indian Army temi tebur ka tasü mang agitetogo.

Ki chirepba jana nungi mezüng Himachal Pradesh state nungi arrshi küm 20 tetsür ka tasü mang agiteta liasü aser Amongnü anguba tasü mangji Haryana kübok Ambala nungi tebur ka lir ta jangjaogo.

Ki kiburtemi iba ki anasaji ali atuba ajanga kiji chirep, ta police-i metetdaksü. Iba lendong atalokba sülen ki kibur ana puogo.



December 22, 2024 nü New Delhi nung Delhi Chief Minister Atishi, AAP National Convener Arvind Kejriwal aser party lenir Manish Sisodia nungeri 'Mahila Samman Yojana' aser 'Sanjeevani Yojana' tenzüksü dang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, DECEMBER (LUCHII) 23, 2024

Temeim jungkai adokdaksüba

Meimdi asüyonga temeimsü maket, tashi manga, peisasa pei taküm mazüoktetter, awashi memetet, tiyazüang jembir ta asüba nisung dang temeim koda sayutettsü ? Nungdak ajak reprangteta yaripet yarir, mapa ajak nung tajanzük agütsür aser aibelenyonga aremzüker, saka kecha hau ta mali, peisasa alir ama bilema ngasangatema alir ta asüba nisung dang temeim koda sayutsü ? Nisung dak aliba shisatsü agibo item ama temeimsü maketba nisungtem dangbo temeim mesayutettsü. Ajisüaka, shitakba temeimjibo temeimsüka asüba agi meimbaji masü saka tesempakatsü asüyonga odang meimbajang shitakba temeim lir. Iba temeimji Tsüngrem temeim lir aser asenok Pa dak amangertem daka iba kasa temeim alitsübaji Tsüngremi asenok dang nungi akanger. Laishiba nung, iba Tsüngrem temeim indang bilemdangba aser asadanga nisungtem rongnung Yisu nütsüng Yohan-a ka liasü ta angatetter. Aji oda, pai Yisu Khrista alimai nisung kümer aruba indang ya bilemdang dang, Tsüngremi alima meimchirtem tesempatsü temenen mapatem ajanga mesamadaksünüi kanga meimba agi, Pa ajaso chir Yisu Khrista alimai yok ta Yohan 3:16 nung shia angur. Iba Tsüngrem temeimji Yohan-i asadang saka masadangtet, anungji " Tsüngremi alima odang meim," ta dang pai asadangtet. 'Odang meim' tetezü meimtsüsa kecha agia langa mali asü, saka angati taochi agi meim. Ibayongji, asenoki ken nunga 'Tsüngrem taochi yabo asenok menen danga taoba,' ta atener. Tetezü, seret nung Tsüngrem taochi ya külen aser asen temenen külen ta enoker odangra, Tsüngrem taochiji kanga agia taretba asütsü. Ashi, asenok menen yaribo asen tanüla dang masü saka temanga dena samar tanü asenok alima nung ya melila. Iba ama angati anguba temeim tulu indangji tenyar Yohan-i bilemdangdang, Tsüngrem ya temeim ta angatet. Iba jagi 1 Yohan 4:8 nung pai ashir, 'Tsüngrem temeim lir.' Iba Tsüngrem temeimji nisung rongnung, parnok tenük agia ngua aser teben agia amdangteta ta jungkai adoka sayuba mapaji Tsüngremi Pa chir Yisu Khrista alimai yokbaji lir ta kasa 1 Yohan 4:9 nung shia angutsü. Yohani asenok nem tali tejangjaba angatetdaksünübaji, Tsüngrem temim jungkai adokba mapa ya lir. Aji oda, paisa 1 Yohan 4:7 nungi 12 tashi nung Tsüngremi meimba ama, asenok rongnunga kati ka den meimtepra, ibaji asen taküm ajanga Tsüngrem temeim jungkai adokdaksür asütsü ta angatetdaksünüa züluba asenoki angur. Tenyar Yohan-i asenok dang Tsüngrem temeim jungkai adokba indang ashiba ya asenok asoshi Christmas osang lir. Christmas anogo nung tesempatsü nisung tamajungertem rongnung Tsüngrem temeim jungkai adok. Iba temeim jagi kodang, takar nisung dak kongshi pai pa akaba kecha mapayui toktsü aser Yisu sülen anidak. Kasa temeim jagisa kodang tular aser takar nisung Zakia ama dak kongshi, pai Yisu tsüngdang pa akaba tesadang ka sensakertem nem agütsütsü nangzük aser tim masüba nung tangar dang rakzüka agiba rongsen lira, parnok nemjibo pezüsü agi temloker agütsütsü mulungtetba Luke tapu 19 nung shia aliba asenoki angur. Atangji, tenyar Yohani ashiba ama, Tsüngrem ya temeim lir, anungji kodang asenoki iba Tsüngrem temeimji agizükdir, asenok taküma temeim agi sünga akümer. Anungji, asenoki tanüla samaa aliba atema temulung shiranga bilemer aser khuret abener, aser asenoki asen akaba agi nungdakba purtem yariner. Aji oda, kodang asenok dak Tsüngrem temeim lidir, asenoki tangar meyong tim masüba lenmang nungi agizüka agitsü bilemtsü melena asenoki ang enoksemer agütsünür. Tsüngremi Pa temeim asenok tenük agi angutsüsa jungkai adoka sayuba ama, asenokia asenok dak Tsüngrem temeim alibaji jungkai adoka sayutsü Tsüngrem o agi ajungshir. Asenok dak temeimbo lir saka iba temeimji jungkai adoka tangar dang mesayutetra, temeimji temeim masü akümtsü. Atangji, yangi tamalen shisemba ama, Christmas ya temeimsüka asüba purtem dang meimba Christmas masü saka temeimsü maket, tesempatsü aketba purtem kümzüksü asoshi meimba Christmas lir. Iba tangatetba nung, asenokia temeimsü maketba purtem taküm aser tanüla karbo kümzükttetsüsa temeim sayutettsü atema iba Tsüngrem temeim tashiji meshidi. Iba tashiji medeni asenokibo Tsüngremi asen dang odang meimba ama, tangar dangbo odangbo memeimtettsü. Iba temeim yabo tang ama Christmas mapang, asenok jungtepa aser meimtepa alirtem rongnung lemsatepba temeim dang nungi kanga agia tuluba aser taoba. Iba temeim jagibo tular, aka maka, amang sangwa, timtem ali mali kecha mali, timtemba purtem odang yariner, atsüngzüka oa alirtem bushia oa ajungshir aser samaa aliba tanülatem odang kümzükner. Atangji, iba temeimji Tsüngrem temeim lir, iba temeimji asen dak melira, tenyar Yohani ashir, asenok dak Tsüngrem mali.

OLEMSABANG

KHRISTMAS KOMA MUNGLA

~ Mrs. R. Mapukala, Rtd Teacher,
Merangmen Tzurangkong.

Akhi tesüiba Khristmas bilemdangra menungraseta bilemteter. Tenla kidang shiti sentsü tapu balala mejeber, Arem nungi shizüng zü bener atoka mesanger shitilemji malok. Tenla kima sümomo aser asang tetong songa yur, Yisu asoba anepdang atongtsü yongyatep meso. Khristmas anepdang tenla kidang kongki ola maten tongmelang ken, Metsüa memeyok tenüka marepshi-i kodaker kenten ola ama anga.

Khristmas anepdang Ojalai ropo nung shi inoka asoba aon, Chuba langpang nung chiyonger ama kinüngertem pelatepa chiyong. Sentep temer tenla kima nungi benjong naro amer ayipzüa, Ken tena jajadang Yirusalem yimdong nüklai aru. Tenük merem mali, ochi, temulung temerük, tako mali. Kibong ka ama telongjem, purapuji maden longsotep meso. Benjong kibur kima amchi nung chitem sala-a chiyongtep.

Tanü tasen putu, purapitet agi meimchir kolok sünger, Kodakbo shingai mongudang, saka kodakja yamaiang südija ta, Anü talu den yimti yimdong, kilong ajak sentsüpranga ayar. Ya alima asü Kodak ta taküm shiai bilemdanger. Anünglen penzüdangra kilem ajak prangshia petinu lashir. Tang chiyongtsü makara pelatep meso, junger jai... Kar alima shi benjong, karbo tanela terenemba mapang.

Küm piyong Khristmas yongya karibo metongtet- leper nung Khristmas. Kar tashidak agi menep- mozüki nung- Khristmas. Kar temang tesadang süa atok- atepzüng nung Khristmas. Karbo aben süoshi maka-mimong nung Khristmas. Karbo sentsü ulura, takari taochi mesayu-Mejangba mesak. Kar-i alima ya pei sensoli ama pilem-mejangba mesak. Yisui-bo Pa taküm ajanga agütsü, karbo temeim meinyakdangi asü yimi alu.

Oh ! Tsüngrem ajaso Chir ! Na mezüng Eden nung tenzük, Meimchiri yongyaseter, na asoba pilemtetba anogo. Nashi ki ka nungang jungkai atok, alimai tesangwa bener aru. Yimjung aser tesünep abensang, Nazaret nunger Yisu. Sentsüprang longja petinu medem, Mari o Yoseb chir. Na asoba tepela benjong küm shia onoki amunger. Saka ali meimchirtemi chichia mangatet asü na!

Dokan kiburtem pelateper, Yisu benjong nung süoshi alirtem dang. Sen juli asünger amentsüa mapang mali, sen ayutsü banki asemteper. Küm piyong rizüngba sen, karbo süoshi, shi, ango alidang intokmar, Saka temulungjang sobutsü telongbo merükteta mali. Ki narobo ajaklen tobur junga inoker. Yisu tobur ajungba-bo meimchir aika dak majiteter. Sübotsü aser ki naro jagi shidakba Yisu-ji ne dak sodima?

Petinu sentsü balala inoka alima lemla-lemla yadaktsür. Saka yimti aser kilung nung Yisu tesangwa melira koda ! Nükmerem, rongsen penbuba, asüküm asen den ali tashi, Nashi ki nung yalokba teperang petinu sangwa memesük. Chiyongtsü tapu palala bendena chiyongtepaka, Kibong aser lokti nung tanela tekumtet chiyongtsübo maden. Amajok nung meimchirtem jiloshi air Telok mesük.

Adianu! Koba anogo asenok tila kümtir - chichiba Khristmas. Koba anogo timtemer dang aochi bilemdir- chichiba Khristmas. Tema tobur ajung masü, molungsentsü tobur junga renemdir- chichiba Khristmas. Sübokrem magitsü lemtetba anogoji-ang-chichiba Khristmas. Anünga meyoisensaker nem agütsübaji-ang-chichiba Khristmas. Putu tasen den mera tasen jaja aodang Yisu sangwa ne dak ngudakjang. Chichiba Yisu asoba tesangwa taküm shia nung jungkai atokdakjangma. 2024 KÜM NAIA KHRISTMAS KOMA MUNGNÜR !!!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Global Methodist Church-i Nigeria nung züngsem 3 tepsetba aitsür



Taküm September ita nung San Jose, Costa Rica nung Global Methodist Church lokti senden nung tekülem agidang tangokba noksa nung angur.

December 22, 2024: Global Methodist Church-i Nigeria nung United Methodist Church (UMC) nung züngsem tepsetba aitsüogo.

GMC Assembly of Bishops-i sangdong ka ajanga, Munga Dosa, Nigeria nung telok ana tsüngda rara adokdang UMC züngsem asem asü aser ki aika rongdoktsüogo, ta metetdaksü.

GMC-i, "Nisung asüba aser takoksa anguba atema onoki jashia bilemer. Onoki rara tapu ajak aitsür aser Global Methodists aser United Methodists ama telok ajak dang yimjung yanglurtem asütsü ayongzüker," ta metetdaksü.

"Onoki Arogo aser alima nung Khristantem dang timtem balala ajangshirtem atema sarasademjang ta ayongzüker. Iba dak alia Munga Dosa nung yimjung atema sarasademjang ta mepishir," ta GMC-isa metetdaksü.

GMC-i, osang tejangja mesüra mamangtsüla, kechiyong social media nung osang tai aika proker, ta metetdaksü.

Osang angazükba agi, tan hopta tetenzüklen Bunkabu

nung aliba Bwoi United Methodist Church nung Amongnü senden ka agiba sülen GMC aser UMC züngsemtem tsüngda mangatetep adok. Parnok tsüngda raradang anasa aliba azü-ki aika rongdoktsü aser tanur ana asü. Iba dak alia arrshi küm 27 tebur ka asü. Paji UMC nungi Arogo lenir, Elisha Masoyi liasü ta jangjaogo.

State sorkari area nung aliba UMC aser GMC Tenla kitem shibangtsüba sülen parnok tsüngda mangatetep adok. Arogo lenirtemi ashiba agi, akhidang nungi kibongtem tsüngda tsükchitepba nungi mangatetep ya adoka liasü.

GMC nungi Bishops John Pena Auta aser Scott Jones nati külem sangdong ka ajanga, "Onoki rara tapu ajak aitsür. Talisa item rara nung Methodist Arogotem nungi züngsemtem densema lira onoki sashia aitsür. Onoki ajak dang temeim aser tangatetba tajung alitsü aser akhümtsübutepsü ayongzüker," ta metetdaksü.

UMC nung Bishop shima alisang Ande Emmanuel aser Nigeria Lead Bishop, John

magyimer aser yirua alirtem atema sarasademtsür. Khristmas atongtsü mapang ana nung lia tai maket nisung aika süogo," ta Arogo lenirtemi metetdaksü.

Evangelical Church in Central Germany (EKM) nungi, Bishop Friedrich Kramer (Magdeburg)-i, "Magdeburg Christmas market nung tatalokba ya onoki mamangteter. Takoksa angurtem aser parnok kibongtem atema onoki sarasademtsür," ta metetdaksü.

Takoksa angurtem nem akhüm agütsütsü aser sarasademtsütsü atema Amongnü 9:00 ako nungi nikongdang 6:00 ako tashi Magdeburg Cathedral lapokja liasü.

December 21 nü arrshi küm 50 tebur kati SUV gari ka anir Khristmas market-i oa nisung longsoa alidak tsükoktsü. Iba tatalokba nung nisung pongu asü aser nisung 200 dak tali

Schol natia, "Khristantem tsüngda, talisa Methodist kibong nungi adianutem tsüngda raraba ajanga onok kanga jashir," ta metetdaksü.

Tenatisa, "Onoki GMC züngsem ajak dang tangsa rara anentsü aser tensa raksadaksütsüsa osang tai meproksü mepishir. Yamaji onoki United Methodist züngsemtem danga yimjung atema inyaksü ayongzüker," ta metetdaksü.

Küm aika o entepa aruba sülen taküm küm tetenzüklen UMC General Conference-i kasa atsüapong kibong kümer alirtem moatsüba nokdanga aliba ozüng agientsü atema vote agüja liasü.

Kasa atsüapong kibong kümer alirtem moatsütsü Arogoi telemtetba agiba anema Arogo 7,500-i UMC toktsüogo aser Arogo meyirjang aikati GMC nung denogo.

Nigeria nungbo kasa atsüapong kibong akümba mesüra shi nung medemba ya ozüng alema lir, iba denji külemi sorkaria LGBT advocacy groups nung adenba nokdang.

Iba nisungbaji Saudi Arabia nung Taleb al-Abdulmohsen lir ta jangjaogo. Al-Abdulmohsen ya psychiatrist ka lir aser pa ya Magdeburg nungi mile 25 shi pilar aliba Bernburg jila nung alir. Iba lendong atalokba sülen mapang tatsüka tsüngda pa apu. 2006 küm pa Germany-i aruba sülen küm ter shi lir pa nem refugee jenjang agüja liasü.

2016 küm nunga Germany yimtiba, Berlin nung Islamic kiralongrartemi truck ka amshia Khristmas market amakdang nisung 13 asü. Iba tatalokba sülen nungibo Germany nung ketdangsertemi Khristmas markets nung security akhangshi.

Magdeburg ya Saxony-Anhalt yimtiba lir aser mapang ka nungbo iba yimti ya Communist East Germany shilem ka liasü. Magdeburg nung nütsüng 2,40,000 lir.

ANOGO ABEN TSÜNGREM DEN

Tesangwa Yokba

- Mathi 5: 13-16

Nenok meimchir tesangwa. Tenem nung aliba yimti memeyimtet. Mat 5: 13-16.

Ernie Pyle, pa mapa tulu tatembang kati arur ta metetta, pa tembar dangi temepishiba shiti ka zülu: "Na tesangwa temdaki ta Tsüngremi metet".

Iba temepishiba tayimtenba ya kin ajak noksa lir. Mr. Pyle teyari asoshi Pa tembar dangi aoba ama, asen Kini inyaksü akok. Atangji Yisu Khrista arogoi tembar kati ama Kin nüngdak nung langzüksü akok. Naga kin nüjiso atema Küm kwika ayimtena arur? Arogoi koba tashi shilem agia lir? Ao kin melenshitsü kobika jembia arur?. Ao Kin melenshitsü atema arogo-i kechi inyaker.

Rongsen ketsüng aser nisung mulungjang anisüngzükdak lendongbang nung lir. Telemtetba shidak agiba nung kodanga au ta mali aser temerenshi, senchimenchibo yakta sashi sashia agir. Arogoi Tsüngrem O ochiji jembitsüla, Tsüngrem Tanela nok-o-nüji amer tetsükchitep tashiji azüshitsüla. Ibaji arogo tesangwaji yakta yokdi.

Itemi shisadangan: Arogo aser state tsüngda keni tebandang alitsüla ta nai bilemer asü? Arogo asoshi statei inyaksü kar lir asü? Aji kechi? State asoshi Arogoi inyaksü kar lir asü? Aji kechi? Asenok lima nung Arogo aser State tsüngda tesendaktep raksaa lira, Khristan ka ama, teraksaji yanglushitsü atema asenoki kechi inyaksüla? Nai kechi inyaksü akok? Ibaji tang nai inyaksü asü?

Shisataka aser temetetba shisatsü tang Kü nem agüjangma. 2 Puti 1:10.

Saka nenok rongnung kar shisatsü agi anunga lira, atalaa marütsüi angati ajak nem agütsüba Tsüngrem dang Pai meshidakjang; aser aji Pa nem agütsütsü. Yakob 1:5.

YISU ASOTSÜ ALIBA KULI

Mathi, Mark, Luke, Yohan Ano

Isaia 1:30, 31, 32

Elizabeth, Zakaria kinungtsu liasü

Aser Elizabeth Aron Semchir liasü.

Luke 1:5

MARI-I ELIZABETH SEMDANGBA

Elizabeth, la Mari-er

Kinunger liasü,

Elizabeth mashisa lir ta angashia

Mari la semdangi ao

"Mariji Yisu Tetsü liasü"

"Idangji, Elizabeth-i ashi"

Ku Kibuba Tetsü kü dangi

Arutsüsa Ya kü dak ang ataloker?

Luke 1:43

Iba Mari agi Yisu shiba dang

Krista ta aja, Paji aso.

Mathi 1:16

Aser Yosefi Pa Tenüng

Yisu ta aja.

Mathi 1:25

Kechiaser Ainkar ajanga Kibubai

Jembiba O ya ataloktsü asoshi

Ya ajonga atalok, Tanela Temeshi agi lir.

Mathi 1:20-21-22

Tarutsü aliba Chuba, Yimjung Chuba chir ta ajatsü,

Lai Jaboso ka asotsü aser Nai Pa tenüng Yisu ta ajatsü,

Kechi Yong Pai Pei Nüburtem parnok Temenen

Nungi Kümzüksü.

Mathi 1:21

Ochi Aser Temeshiba agi aji ajungkettsü,

Aser Yimsüsüba Pa Tapubang nung alitsü.

Isaia 9:6-7

Pa tulu alitsü aser pa dang Tematiba

Meyong Chir ta ajatsü.

Luke 1:30,31,32

Germany nung Khristmas market amakba Arogoi aitsür

Magdeburg (Germany), December 22 (Agencies): December 21, 2024 nü Germany kübok Magdeburg nung kiralongrartemi Khristmas market ka amakba sülen anogo ka lir Council of the Evangelical Church in Germany (EKD) chairwoman, Bishop Kirsten Fehrs aser German Bishops' Conference chairperson, Bishop Georg Bätzing nati iba tatalokba aitsüogo.

Tenati külem sangdong ka ajanga, "Germany aser alima tesem balala nung nüburtemi iba tatalokba atema mangyimer aser jashia bilemetsür," ta metetdaksü.

Iba tatalokba nung tanur ka densema nisung pongu asü aser aika yirüogo.

Arogo lenirtemi mangyim jashi lemsatepba den külemi takoksa angur kibongtem atema sarasademtsüba lemsatep.

"Iba tatalokba nung takoksa angurtem atema Arogotemi

AO OSHI ANGAZÜKDAK:

TANÜ ANGAZÜKTSÜBA OJANG



Tatsü

(n) tebur oset nung aketba tejang ana (testicles)

* Tebur tatsü shia tasazük centimeter 5 shi alir.

Tatsük

(adj) mi aser anü agi arongba tashi (hot)

* Anü tatsük nung süoshi yakta akonger.

OLONG PAITEP # 7018

Grid for OLONG PAITEP # 7018 with numbers 1-15 in various cells.

TIPLIN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. ____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 7017 TELANGZÜBA

TIPLIN :

- 1. Semtu, 3. Lepko, 5. Bilem, 8. Ulu, 10. Tsüngpang, 11. Tesangwa, 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong, 6. Lungkak, 7. Milak, 9. Zünga, 10. Temopu, 12. Walu, 14. Ali.

NAI-A YA METETTER MA

World Meditates with Gurudev poster featuring Sri Sri Ravi Shankar and event details for Dec 21 at 10:30 PM SGT.

Spiritual leader Sri Sri Ravi Shankar-i ayongzükba 'World Meditates with Gurudev' ajanga record aika yanglutetogo. Art of Living Foundation ajanga ayongzükba sentong nung alima tesem balala nungi nisung million aikati shilem agiogo aser Guinness World Records, Asia Book of Records aser World Records Union nung zülüokogo. "The first World Meditation Day" nung linük 180 tema nungi nisungtem senteper collective meditation agia liasü. Iba atema Guinness World Record-i ? "most viewers of a guided meditation live stream on YouTube" kuli agütsü. Asia Book of Records-i "maximum participation from all the states of India in 'Guided Meditation' in a day" aser "maximum nationalities participated in Guided Meditation in a day" kulitem agütsü. Maneni World Records Union-i "most views for an online guided meditation in 24 hours on YouTube" aser "most live viewers of a guided meditation session on YouTube" kulitem agütsüogo.

Onoki Bru-Reang nunger nem teyari aika agütsüogo: Amit Shah



Union Home Minister Amit Shah

Agartala, December 22, 2024 (Agencies): BJP sorkari Tripura nung Bru-Reang nunger lidaktsütsü atema mapa inyakogo ta Union Home Minister Amit Shah-i ashi.

Sorkari Bru-Reang nunger 40,000 nem shisaliok aser tziü temerük dena nungdakbatem agütsüogo ta Shah-i ashi.

"Bru-Reang nunger jenjang tamajung nung liasü, parnok water, electricity, aser toilet facilities maliasü" ta pai ashi.

"CPI(M)-i kü 35 tashi Tripura nung sorkar yimsü süa aru aser Congress-ia küm aika yimsü süogo saka parnoki Bru-Reang nunger atema

mebilemtsü. Tripura nung BJP sorkar aruba sülen onoki nisung 40,000 lidaktsütsü anepalu aser nungdakbatem agütsü" ta Shah-i ashi.

Dhalai district kübok Kulai RF Village Ground nung Amit Shah-i Deobarnü Rs 668.39 crore alang terenlok mapatem inyaksü atema lung azüngtsüogo.

2017 küm pa BJP National President inyakdang Tripura semdangba bilemteta jembidang "ni yangi anogo pungunü amongdang nisung trok aser züngsem 11 dang aden. Tripura nung BJP karyakartas-i kanga meranga inyak aser Communist

sorkar atsüngdok. CPIM-i state madak ketdangsdang nisung 2.5% shi kati dang tziü tajung angu saka tang nisung 85% shi kati piped water angur" ta Shah-i ashi.

CPIM-i kodanga sensaker nem angati rations magütsü saka tang nisung 82% tashi angati ration angur, ta paisa shisem.

"Tripura nung taoba sorkartemi schemes tenzük saka itemji asangsang nung mapa küma meinyak. Tang BJP-i anir state nung sentong aika inyaker aser iba ya PM Narendra Modi lenisüba kübok state aser Centre sorkartem ajanga lir" ta paisa metetdaksü.

Manipur police-i PREPAK (Pro) züngsem ka apu

Imphal, December 22, 2024 (Agencies): Manipur police-i December 21 nü People's Revolutionary Party of Kangleipak (PREPAK) züngsem ka puogo.

Kakching, Thoubal, Imphal West aser Imphal East areas nung tashiyim agi senn saruba atema iba nisung apu.

Osang tejangja ka angazükba sülen police-i mita aodang Salam Dhananjay Singh @ Muba (49) apu. Pa ya Hiyanglam Awang Leikai, Kakching district nung alir.

Iba nisung yagi Kakching, Thoubal, Imphal West aser Imphal East nung public dang tashiyim agi sen sarua senzü.

Police-i pa ket nung mobile phones ana ngutetogo.

December 20 nü Manipur nung sepaitemi Torbung Bazar, Churachandpur District nung nisung ka apu.

Iba nisung ya Jamkhomang Haokip (27) ta jangjaogo aser pa ket nung pistol ka bena aliba puogo.

Tanur kibong kümdaktsüba ken o atema nisung 416 apu



Tanur kibong kümdaktsüba ken o atema nisung apu kar noka nung angur.

Guwahati, December 22, 2024 (Agencies): Assam police-i December 21-22 aonung tanur kibong akümba anema maparen shilem tasembuba inyaka liasü.

Idangji police-i nisung 416 apu aser ken o 335 benokogo. December 22 nü parnok okadaki anir ao.

"Sorkari lokti nung temenen

mapa samatsütsü atema tenangzük yur mapa inyaker. Onoki maneni iba temenen mapa agientsü asoshi mapa inyaksü" ta Chief Minister Himanta Biswa Sarma-i ashi.

Dec 21-22 aonung Phase 3 operations inyakdang nisung 416 puogo ta pai ashi.

Dhubri police-i tanur kibong akümtsü nung yaritepba aser

sentong ayongzüka agiba atema nisung 68 apu.

College TOP, Bazar TOP, Dharmasala, Soulmari, Gauripur, Golakganj, Tamarhat, aser Bilasipara nung nisungtem apu.

Assam sorkari tanur asüdang kibong kümdaktsüba inyakyim anendaktsütsü atema inyaka arur.

MULUNGNEN O

Aso : March 1928

Asü : 11/12/2024

Onoki teti meima aliba ojala/otsüla asür **IMTAJENLA** (Molungkimong) shiranga aliba mapang aser alima nungi pilaba mapang onok den yariteper ajak dang ozü temulung taroktiba nungi pelaba lemsateper. Tembar, kinunger, kidanger, Arogo, lokti balala aser temulungertemi yimya balala nung ozü dang temeim sayuba aser mapa tajung inyakba atema kanga pelar.

Ozü mulung zürep tia nung alidang nenoki yariba ajanga ozü mulung anisungzüksüogo, tulusang Tsüngremi nenok ajak moajang ta ozü sarasadem.

Temeim chirnur aser semchirtem.



Trump-i Panama Canal meyipa agitsü amokmeren



Washington, Luchii/ December 22 (Agencies): Alima nung mazüngtiba tzü lenmang, Panama Canal ajanga senzüba US rong tem dang Panama-i sen tali meshir ta tai tonglokja United States tir inyaksü shima alisang Donald Trump-i iba tesem tanaben meyipa agitsü amokmeren.

“Asen Navy aser Commerce kangasa tim mesüi amshir. Panama-i taa meshiba ya temenünütsüka lir. Asen linük yamai raksatsütsü merangba ta tangsa anentsüla,” ta Trump-i pa indang Truth Social sapang nung Honibarnü ashi.

US-i iba canal tuluba 1914 nung yanglu aser iba tesem temeket küm aika ketdangsüa liasü. Saka külemi mapang tatsüka ketdang sür iba canal ya Washington-i Panama nem 1999 küm agütsü.

Atlantic aser Pacific tzüym sendaktepba iba canal nungya China-ia shilem agir ama Trump-i ashi.

“Iba tesem ketdangsütsü ya Panama meyong, China meyonga masü, mesüra shinga meyonga masü. Onoki iba tesem ya teka tai nem KODANGA magütsütsü!” ta pai ashi.

“Ibai dangar ajangzüksü asoshi agütsüba masü, saka onok aser Panama tsüngta amalitep temaitsü ka dang lir. Iba tesem agütsüba tangatetba aser legal principles sülen

manidakra, onoki Panama Canal meyipa meshitsü aser yangji tasüngdangtsü kecha mali,” ta Trump-i ashi.

Iba ya ajanga Trump kübok US diplomacy nung temelenshi alitsüba sayur, shibai temlai linük amokmerentsü arendaka malir aser o tesepra jembir.

Taoba ita Trump-i pa indang administration tenzükba anogo nungi Mexican aser Canadian imports nung tariffs meshitsü ta ashi aser ibaji kuli tejangja maka migrants aser temesepba mozü aitba metemba tashi alitsü ta ashi.

“Mapang talangka nungi benshia aruba tebilemtsü ya mela-mela bentettsü atema Mexico aser Canada dak tashi aser temeden lir. Onoki iba tashiji amshitsü akhanger, aser aji meinyak tashi, parnoki taa tulu agütsütsü mapang lir,” ta pai Truth Social sapang nung lemsatep.

Panama nung ketdangsür temi Trump indang post nung telangzüba agüja mali.

Alima nung tzü lenmang nung jajaba shilem 5 shi Panama Canal ya ajanga aor, koba ajanga Asia aser US East Coast tsüngta jajaba rong tem South America meketa lenmang tamajung aser talang nung mejajai iba canal ya ajanga jajar.

Taoba küm revenue nung sen \$5 billion jungnüa aazükogo ta Panama Canal Authority ajanga October ita shia liasü.

Brazil nung gari ana tsüktep, nisung 38 asü

Teofilo Otoni, Luchii/ December 22 (Agencies): Brazil southeastern tsütsü Minas Gerais state kübok highway ka nung passenger bus ka aser truck ka Honibarnep tsüktepba nung nisung 38 asü, ta ketdangsür temi ashir.

Minas Gerais fire department ajanga ashiba agi, nisung 13 tashi Teofilo Otoni anasa mozüki temi bener ao. Iba lendong ajuruba bus ya Sao Paulo nungi apuso aser nisung 45 mena liasü ta ashir.

Lendong ajurur ajak iba tesem nungi anir ogo aser bushisüngdangba ajanga iba lendong atalokba jangjatsü ta ketdangsür temi Honibar nikonngang ashi. Tenük kuli alirtemi rescue team dang ashiba agi, bus indang tire ka apok aser driver-i mazüokteti

truck ka den tsüktep. Ano karibo bus nungya granite block kati atsük, ta fire department ajanga ashi.

Ano gari ka nung nisung asem mener bus den tsüktep, saka yangji mena alir ajunga takum kumzük.

Gov. Romeu Zema-i Minas Gerais sorkar dang lendong ajurur alir den yariteptsü totuyuba agütsüogo, ta social media sapang X nung ashi.

“Lendong ajurur aliba kinungertemi iba lendong timtem agizükttetsüsa onoki talisa Christmas atongtsü mapang akokba lenmang nung yaritsü inyaktepar,” ta Zema-i ashi.

Brazil Tir Luiz Inacio Lula da Silva-ia Honibarnü sangdong ka nung Minas Gerais nung federal

ketdangsürtem oa lir ta ashi.

“Teófilo Otoni, Minas Gerais nung lendong tulu atalokba asoshi kanga sasar aser asür nisung 30 dak tema kinunger atema sarasademtsür. Iba lendong tulu nung takum jenbua alirtem tanepstsü angutsü atema sarasademtsür,” ta Lula-i ashi.

Brazil nung 2024 küm iba ama gari lendong nung nisung 10,000 dak tema asü, ta Ministry of Transportation ajanga ashi.

September ita nunga football team ka mena aliba bus ka makepa nisung asem asü. Brazil south tsütsü Curitiba yimti nungi Curitiba Crocodiles team ya Rio de Janeiro nung par linük indang American football championship asayatsü aodang iba lendong ya ataloka liasü.

US-i Yemen nung Houthi pur tamendakdak makogo

Washington, Luchii/ December 22 (Agencies): United States military-i ashiba agi, parnoki Yemen yimtiba Sanaa nung Houthi pur tamendakdak anüng ajang makogo, kong missile bendena ayuba tesem ka aser “command-and-control” tesem ka densema liasü.

US Central Command (CENTCOM), shirnoki Middle East nung US Army inyakyim achayanger parnoki Honibarnü ashiba agi, Houthi pur inyakyim raksatsütsü nükjidong nung parnoki item tesemtem makogo.

Kasa mapang nung Houthi telok nungi ketdangsür tejen kati ashiba agi, US-i Yemen amakba ya kiralongrar inyakyim ka lir.

“America nunger kiralongrartemi iba tesem amakba ajanga iba tesem nung temzüng ozüng maliba aser

ozüng alema inyaksangshiba jangjashitsür,” ta Houthi telok Supreme Political Council züngsem Mohammed Ali al-Houthi-i ashi.

“Kiralongrar inyakyim benoka Yemen amakba ajanga Gaza pusemba manendaktsütsü,” ta ketdangsür yagi shisem.

Iran den sendaktepa aliba telok yagi taoba mapang Red Sea, Bab al-Mandeb aser Gulf of Aden nung US Navy aser shishilembartem indang rongtem makogo, ta CENTCOM-i social media sangdong ka ajanga metetdaksü.

Deobarnü US military-i ashiba agi, Red Sea tekolak nung parnok indang navy pilot ana khazüka yokogo. Pilot anaprongla taküm lia ngutetogo. Pilot anarongnung ka tera yirua liasü, ta United States Central Command (CENTCOM)-i

metetdaksü.

Iba hopta Israel military aser Houthi telok na katika tamendakdak maktepba mapang ka nung iba ya ataloka liasü.

Israel-i Brehostibarnü Yemen kübok tesem balala makogo, kong Sanaa anasa power station tem amakba densema lir.

Israel-i item tesemtem amakba sülen nisung teku tepset. Houthi teloki Tel Aviv dak missile ka khaloktsüba sülen Israel military-i meyiper item tesemtem maka liasü.

Honibarnü Houthi puri ashiba agi, parnoki central Israel dak ballistic missile ka khalokja liasü.

Israel military-ia parnoki iba missile mekhangtetba metetdaksüogo, koba Tel Aviv kübok Jaffar tesem nung tsüka liasü.

DR Congo nung rong ka meküpok; nisung 38 asü

Kinshasa, Luchii/ December 22 (Agencies): Democratic Republic of the Congo northeast nung ayong ka nung passenger bena aliba rong ka meküpokba sülen nisung 38 süogo aser nisung 100 dak tema samara bushidar, ta ketdangsürtem aser tenük kuli agütsürtemi metetdaksü.

Busira ayong nung Hokolbarnü iba rong ya meküpokba sülen tang tashi nung nisung metsübo kümzükogo. Iba rong ya tanga rongtem den külemi oya liasü aser passenger tem ya shishilembartem timba liasü shirnok Christmas benjung atema kidangi meyipa oya

liasü, ta Ingende mayor Joseph Joseph Kangolingoli-i ashi.

Ingende nung alir Ndolo Kaddy-i ashiba agi, iba rong nung nisung 400 dak tema mena liasü kechiyong rong ya Boende-i aoba mapang Ingende aser Loolo nung anenzüker, anungji nisung timba sür alitsü ta bilemer, ta Associated Press news agency-i metetdaksü.

Centre sorkar ketdangsürtemi iba tatalokba dak sendakba nung mesüra tekümzükba maparen indang osang kecha agüja mali.

Congolese ketdangsürtemi rong nung nisung talila anir mesenzütsü atema tekümdangtsü metetdakja

arudar aser tetuyuba agütsür aliba sülen manidakertem merenshitsü tenangzükba agütsüogo. Ajisüaka kinük nung aliba tesemtem nung nisung aikati public transportation tem metuzüker.

Linük northeast nung rong ka meküpoka nisung 25 asüba sülen anogo pezü majung tsüngda iba rong ya meküpokogo.

October ita rong ka Lake Kivu nung meküpokba sülen nisung 78 asü. Iba rong nung passenger noklang aika mena liasü.

Maneni June ita nunga Kwa ayong nung rong ka meküpokba sülen nisung 80 taküm sama liasü.

Nagaland team Senior National Tug-of-war C'ships nung asayatsü



December 21 nü Kohima nung tatembangbuba practice session agiba mapang Nagaland team den Dr. Er. Vekho Swuro tangkoba noksa nung angur.

Kohima, Luchii/December 22 (TYO): Nagaland tug-of-war team Mumbai nung 37buba Senior National Tug-of-war Championships nung asayatsü renema lir. Iba asayamung ya January 5 nungi 8 tashi asayatsü.

Iba asayamung ya Tug-of-War Federation of India-i ayongzükogo. Iba lokti tentet ya Tug-of-War International Federation, South Africa nung züngoksema lir.

Nagaland team iba asayamung nung Men's senior (Catch weight) category nung asayatsü.

Nagaland team nung asayar ter lir aser itemji; Menuosetuo Yiese, Vechita Khesoh,

Vemele Thingo, Sedevizo Keretsii, Vekuzo Vezuh, Heuci Kulim, Rukukhotho Khusoh, Neikhozo, Toino Awomi aser Thepukhoyi Swuro nung lir.

Tribal Affairs Department, Nagaland-i ayongzüka Nagaland tribal tug-of-war tetoktepba ayongzüka asayaba mapang selection trial agiba sülen Nagaland team nung asayatem ya shimogo.

Osangbenertem den senaksema mapang Nagaland Tug-of-War Association tir Dr. Er. Vekho Swuro-i ashiba agi, Nagaland tug-of-war team tatembangbuba practice session tanü 13th Assam Rifles sepaitem den Kohima nung

agiogo.

Pai, 13th Assam Rifles dang kanga pelaba lemsatop aser mejeta CO Col. Tarun Rana aser 2nd-in-C major Sudeep Sharma dang iba asayamung atema Nagaland team nem technical teyari agütsüba atema pelaba lemsatopa liasü.

Dr. Er. Swuro-isa, taruba asayamung atema Nagaland team sponsor asüba atema Nagaland Chief Minister Neiphiu Rio dang kanga pelaba lemsatopogo.

Dr. Er. Swuro, aser Nagaland Tug-of-War Association general secretary Chikhozo Sapu nati anir Nagaland team iba asayamung nung oa shilem agitsü.

Manchester City defender John Stones yiruogo

Luchii/December 22, 2024 (Agencies): Center back John Stones, Honibarnü Premier League nung Manchester City puri Aston Villa goal 2-1 agi makokba asaya nung yiruogo.

England nung asayar ya tetsüng nung timtem aliba ajanga ita ka tsüngda Honibarnü mezüngbuba tetenzük nung asaya liasü saka pa halftime nung melenatok. Pa ano tanaben yirushiogo, ta City manager Pep Guardiola-i ashi.

Guardiola Manchester City pur tawa kanga mejungi asayaba ya asayatem aika yiruba ajanga lir ta shiogo. Pa tang asaya aliba season nung asayamung ajak senteper asaya 12 nungi teku nungbo tamakok ngur lir

Kasa mapang nung Ruben Dias-a tetsüng yiruba sülen hopt pezübo masayatetsü ta Hokolbarnü jangjaogo.

"Team nung central defender ka dang anema lir aser ibayongji team yanglutsü kanga tasak kümogo," ta Guardiola-i ashi.

Villa Park nung Aston Villa aser Manchester City na asayaba mapang Jhon Duran aser Morgan Rogers nati goal

kaka idaktsüba sülen taoba PL pezü atonga koker aliba team ya tang asaya aliba season nung asaya 12 nung tekububa nung tamakok ngua liasü. Pep Guardiola-i aniba team yagi iba mapang asaya ka dang koka lir.

"Result tajung angutsü atema onok defense mali. Parnok majung," ta Guardiola-i ashi.

Kasa mapang nung tasembuba jenjang nung aliba Arsenal puri 5-1 agi Crystal Palace akokba sülen parnoki temaba jenjang nung aliba Liverpool team tera agi dang memenep lir saka parnok asaya ana tali asayatoker lir.

City pur tang jenjang trokbubai asepzüka luogo aser parnoki Liverpool point teku agi memenepi lir aser iba den parnok asaya ana talila asayar lir.

"Result tajung angutsü atema ni kü asayatem koma amshitetsü iba dak keta lir," ta Guardiola-i ashi. "Ni tali bilemlokto süra tang mapang ya lir. Takok tashi tongmelang telemtetba agitsü aser kü principle tem dak rangloker inyaka team nem ken o jangja metetdaksütsü nungdaker," ta paisa shisem.

Ben Stokes Champions Trophy nung masayatetsü



Luchii/December 22, 2024 (Agencies): England Test captain Ben Stokes, taruba ICC Champions Trophy aser iba sülen India nung oa white-ball asayamung ka asayatsü aliba nung masayatetsü, kechiyong pa New Zealand den iba ita tetenzüklen tasembuba Test asayaba mapang hamstring tabelen yirua liasü.

Team management-i Stokes iba asayamung nung asayadakja risk magitsü telemtetba agiogo, kechiyong England team India den Test pongu aser Australia nung oa 2025/26 Ashes asayatsü lir.

Kasa mapang nung taoba Test captain aser tongtibang batsman Joe Root 2023 World Cup sülen tang mezüngbuba

ODI team nung züngoksemogo. Fast bowler Mark Wood, shiba yiruba ajanga tawa asayaba Test asayamung nung masayateti liasü, pa squad anaprongla nung züngoksemogo.

India nung asayatsü aliba asayamung aser Champions Trophy ya coach Brendon McCullum lenisüba kübok England team atema mezüngbuba limited-overs tour aser asayamung asütsü. McCullum ya taoba mapang Test team coach dang liasü.

Jos Buttler maneni white-ball team ana captain kümogo. Ajisüaka Buttler wicket keeper bo mamentsü akok, kechiyong squad nung Jamie Smith aser Phil Salt ta wicketkeeper ana züngoksema lir.

Arishi küm 21 tain Jacob Bethell, shibai New Zealand den asayaba mapang half century asem yanglua liasü pa a squad anaprongla nung züngoksemogo. Leg-spinner Rehan Ahmed T20 squad nung denogo aser Root ODI atema dang shima liasü.

India tour aser 2025 Champions Trophy atema England ODI squad:

Jos Buttler (capt/wkt), Jofra Archer, Gus Atkinson, Jacob Bethell, Harry Brook, Brydon Carse, Ben Duckett, Jamie Overton, Jamie Smith (wkt), Liam Livingstone, Adil Rashid, Joe Root, Saqib Mahmood, Phil Salt (wkt), Mark Wood

India tour atema England T20 squad:

Jos Buttler (capt/wkt), Rehan Ahmed, Jofra Archer, Gus Atkinson, Jacob Bethell, Harry Brook, Brydon Carse, Ben Duckett, Jamie Overton, Jamie Smith (wkt), Liam Livingstone, Adil Rashid, Saqib Mahmood, Phil Salt (wkt), Mark Wood.

England team India-i January 17 nü arutsü aser mezüngbuba T20 asaya ya January 22 nü Kolkata nung asayatsü.

Iba sülen India aser England na February 6 nü Nagpur nungi tenzüka ODI asem asayatsü, koba Champions Trophy atema terenemshiba ka asütsü.

Ivan Juric Southampton head coach kümogo



Luchii/December 22, 2024 (Agencies): Southampton-i parnok team head coach mapang abentsü atema Ivan Juric shimogo. Parnok Premier League nungi metugutsüsa asayatsü asoshi pa nem khuret tulu nongloktüogo.

Juric-i Russell Martin melenogo, shiba taoba hopta mapa nungi anenja liasü. Southampton pur PL table nung bonglang nung aliba mapang pa mapa nungi anenja liasü.

"Onok taküm alitsü asoshi raratsü atema rangloker inyakdar aser pa shimba ajanga onok nem takok ngua asayatsü asoshi temulungtetba ka agütsütsü imlar," ta

Southampton-i sangdong ka ajanga metetdaksü.

Arishi küm 49 tain Juric-i ita 18 atema tenangzüktepba ka yangluogo. Pa tawa Italy club Roma nung ita ana inyaka liasü.

Southampton pur taoba asaya tenet nung trok nungbo tamakok nguogo aser parnok PL nungi metugutsü atema point teku nungdaker.

"Iba ya tayongzükba tulu ka lir, saka ni akoktsü ta bilemer kechiyong iba team yagi tang dang nungi tajungba asayatetsü ta ni nguogo," ta Juric-i ashi.

"Ni aggressive team ka aginer aser Southampton fan temia aji aginütsü," ta paisa shisem.

BILEMDANGANG
"Minute ka menuba dangbo ghonda asem kera tajungba."